



INTRODUCZIUN

DAD ANDRI CASANOVA-BAUMGARTNER

Sch'ei vegn tschentau ina damonda, astgan ins quintar cun ina risposta. Jesus rispunda denton buc sin la damonda sch'el seigi quel che ha da vegnir. Quella damonda vegneva da Gion Battesta. Igl evangelist lai aviarta la damonda, el vul che nus empruein da dar la risposta. Ei Jesus il Messias, quel che porta il salit?

Cun sia damonda prepara Gion Battesta adina puspei la via per Jesus Cristus. E nossa risposta sto buc encurir in strom-paliu che vegn ballontschaus dil vent ni in carstgaun en vestgadira loma. Pertgei gliez ei svaneivel, aschia sco era Herodes Antipas, al qual il text fa allusiun. Nossa eglia da duei esser drizzada sil pauper ed uiersch. Senza prender scandal!

EVANGELI

Mt 11,2–11

²Udend Gion en perschun dallas ovras da Cristus, ha el tarmess ses giuvnals a dumandar el: ³Eis ti quel che ha da vegnir ni vein nus da spitgar in auter? ⁴Jesus ha rispundiu ad els e detg: Mei e rapportei a Gion quei che vus udis e veseis: ⁵Tschocs vesan, schirai van entuorn, leprus vegnan purificai, suords audan, morts vegnan leventai, paupers retscheivan la buna nova; ⁶e beaus quel che pren buca scandal da mei.

⁷Quels ein s'allontanai, e Jesus ha entschiet a plidar cul pievel sur da Gion: Tgei essas i ora el desiert a mirar? In strom-paliu che vegn ballontschaus dil vent? ⁸Ni tgei essas i a mirar? In carstgaun en vestgadira loma? Mirei, quels che portan vestgadira loma anfl'ins ellas casas dils retgs. ⁹Sche pertgei essas i ora? Per mirar in profet? Gie, jeu ditgel a vus: Dapli ch'in profet. ¹⁰Igl ei quel, dil qual ei stat scret:

Uarda, jeu tarmettel miu mess ordavon a ti,
e quel prepara la via per tei.

¹¹En verdad, jeu ditgel a vus: Denter ils naschi d'ina femna ei maina cumpariu in pli grond che Gion Battesta. E tuttina, il pli pign el reginavel da tschiel ei pli gronds che el.